

হিংস্রের কচুরি

আমাদের বাসা ছিল হরিবাবুর খোলার বাড়ির একটা ঘবে। অনেকগুলো পরিবার একসঙ্গে বাড়িটাতে বাস করতো। এক ঘরে একজন চুড়িওয়ালা ও তার স্ত্রী বাস করতো। চুড়িওয়ালার নাম ছিল কেশব। আমি তাকে ‘কেশবকাকা’ বলে ডাকতাম।

সকালে যখন কলে জল আসতো, তখন সবাই মিলে ঘড়া, কলসি, টিন, বালতি নিয়ে গিয়ে হাজির হোত কলতলায় এবং ভাড়াটেদের মধ্যে ঝগড়া বকুনি শুরু হোত জল ভর্তির ব্যাপার নিয়ে।

বাবা বলতেন মাকে, এ বাসায় আর থাকা চলে না। ইতর লোকের মত কাণ্ড এদের। এখান থেকে উঠে যাবো শীগ্গির।

কিন্তু যাওয়া হোত না কেন, তা আমি বলতে পারবো না। এখন মনে হয় আমরা গরীব বলে, বাবার হাতে পয়সা ছিল না বলেই।

আমাদের বাসার সামনে পথের ওপারে একটা চালের আড়ত, তার পাশে একটা ঞুড়ের আড়ত, ঞুড়ের আড়তের সামনে রাস্তার ওপর একটা কল। কলে অনেক লোক একসঙ্গে ঝগড়া-চোঁচামেচি করে জল নেয়। মেয়েমানুষে মেয়েমানুষে মারামারি পর্য্যন্ত হতে দেখেছিলাম একদিন।

জ্যোতিরীক্ষণ

এই রকম করে কেটেছিল সে-বাসায় বছরখানেক, এক আষাঢ় থেকে আর এক আষাঢ় পর্য্যন্ত।

আষাঢ় মাসেই দেশের বাড়ি থেকে এসেছিলাম। দেশের বাড়িতে বাঁশবাগানের ধারে ধুতুরো ফুলের ঝোপের পাশেই আমি আর কালী দুজনে মিলে একটা কুঁড়ে করেছিলাম। কালীর গায়ে জোর বেশি আমার চেয়ে, সে সকাল থেকে কত বোঝা আশস্তাওড়ার ডাল আব পাতা যে ব'য়ে এনেছিল! কি চমৎকার কুঁড়ে করেছিলাম দুজনে মিলে, ঠিক যেমন সত্যিকার বাড়ি একখানা। কালী তাই বলতো। একটা ময়নাকাঁটা গাছের মোটা ডালে সে পাখীর বাসা বেঁধে দিয়েছিল, ও বলতো শ্রাবণ মাসের সংক্রান্তিতে কিংবা নষ্টচন্দ্রের রাতে রাত-চরা কাঠঠোকরা কিংবা তিওড় পাখি ওখানে ডিম পেড়ে যাবে।

এ সব সম্ভব হয়নি আমার দেখে আসা, কারণ আষাঢ় মাসেই গ্রাম থেকে চলে এসে কলকাতার এই খোলার বাড়িতে উঠেছি।

আমার কেবল মনে হয় দেশের সেই বাঁশবনের ধারের কুঁড়েখানার কথা, কালী আর আমি কত কষ্ট করে সেখানা তৈরি করেছিলাম, ময়না গাছের ডালে বাঁধা সেই পাখির বাসার কথা—নষ্টচন্দ্রের রাতে কাঠঠোকরা পাখি সেখানে ডিম পেড়েছিল কিনা কে জানে?

কলকাতার এ বাড়িতে জায়গা বড় কম, লোকের ভিড় বেশি। আমি সামনে টিনের বারান্দাতে সারা সকাল বসে বসে দেখি কলে পাড়ার লোক জল নিতে এসেচে, গুড়ের আড়তের সামনে গুড় নামাচ্ছে গরুর গাড়ি থেকে, বাঁ কোণের একটা দোতলা বড়ির জানলা থেকে একটি বৌ আমার মত তাকিয়ে আছে রাস্তার দিকে। এই গলি থেকে বাস হয়ে বড় রাস্তার মোড়ে একটা হিন্দুস্থানী দোকানদারের ছাতুব দোকান থেকে আমি মাঝে মাঝে ছাতু কিনে আনি। বড় রাস্তার

জ্যোতির্বিজ্ঞান

অনেক গাড়ি ঘোড়া যায়, আমাদের গ্রামে কখনো একথানা ঘোড়ার গাড়ি দেখিনি, ছুচোখ ভরে চেয়ে চেয়ে দেখেও সাধ মেটে না, কিন্তু মা যখন তখন বড় রাস্তায় যেতে দিতেন না, পাছে গাড়ি-ঘোড়া চাপা পড়ি।

আমাদের বাড়ি থেকে কিছুদূরে গলির ও-মোড়ে কতকগুলো সারবন্দি খোলার বাড়ি, আমাদেরই মত। সেখানে আমি মাঝে মাঝে বেড়াতে যাই। তাদের বাড়ি-ঘর বেশ পরিষ্কার পরিচ্ছন্ন, কত কি জিনিসপত্র আছে, আয়না, পুতুল, কাঁচের বাক্স, দেওয়ালে কেমন সব ছবি টাঙানো। এক এক ঘরে এক একজন মেয়েমানুষ থাকে। আমি তাদের সকলের ঘরেই যাই, বিকেলের দিকে যাই, সকালেও মাঝে মাঝে যাই।

ওই বাড়িগুলোর মধ্যে একটি মেয়ে আছে, তার নাম কুসুম। সে আমাকে খুব ভালবাসে, আমিও তাকে খুব ভালবাসি। কুসুমের ঘরেই আমি বেশিরভাগ সময় থাকি। কুসুম আমার সঙ্গে গল্প করে, আমাদের দেশের কথা জিজ্ঞেস করে, তাদের বাড়ি বর্তমান বলে কোন্ জায়গা আছে, সেখানে ছিল। এখন এই ঘরেই থাকে।

কুসুম বলে—তোমায় বড় ভালবাসি, তুমি রোজ আসবে তো ?

—আমিও ভালবাসি। রোজ আসিই তো।

—তোমাদের দেশ কোথায় ?

—আসসিংডি, যশোর জেলা।

—কলকাতার আঁগে কখনো আসনি বুঝি ?

—না।

বিকেলবেলা কুসুম চমৎকার সাজগোজ করতো, কপালে টিপ পরতো মুখে ময়ূরমুখ মত কি গুঁড়ো মাখতো, চুল বাঁধতো—কি চমৎকার মানাতো

জ্যোতিরিন্দ্র

ওকে। কিন্তু এই সময় কুন্সুম আমাকে তার ঘরে থাকতে দিত না, বলতো—তুমি এবার বাড়ি যাও। এবার আমার বাবু আসবে।

প্রথমবার তাকে বলেছিলাম—বাবু কে ?

—সে আছে। সে তুমি বুঝবে না। এখন তুমি বাড়ি যাও।

আমার অভিমান হোত, বলতাম—আসুক বাবু। আমি থাকবো।

কি করবে বাবু আমার ?

—না না তুমি চলে যাও। তোমাব এখন থাকতে নেই। অমন করে না লক্ষীটি !

—বাবু তোমার কে হয় ? ভাই ?

—সে তুমি বুঝবে না। এখন যাও দিকি বাড়ি।

আমার বড় কৌতূহল হোত, কুন্সুমের বাবুকে দেখতেই হবে। কেন ও আমাকে বাড়ি যেতে বলে ?


একদিন তাকে দেখলাম। লম্বা চুল, বেশ মোটামোটা লোকটা—হাতে একটা বড় ঠোঙায় এক ঠোঙা কি খাবার। কলকাতার দোকানে খাবার কিনতে গেলে ঐবকম পাতার ঠোঙায় খাবার দেয়। আমাদের দেশে ঐ পাতা নেই ; সেখানে হরি ময়রার দোকানে মুড়কি কি জিলিপি কিনলে পদ্মপাতায় জড়িয়ে দেয়।

কুন্সুম ঠোঙা খুলে আগে আমার হাতে একখানা বড় কচুরি দিয়ে বল্লো—এই নাও, খেতে খেতে বাড়ি যাও।

এক কামড় দিয়ে আমার ভারি ভাল লাগলো। এমন কচুরি আমাদেব গ্রামেব হরি ময়রা যে কচুরি করে, সে

তেলে-ভাজা কচুরি এমন চমৎকার খেতে নয়।

উজ্জ্বলিত কুন্সুম আম—বাঃ ! কিসের গন্ধ আবার।



জ্যোতিরঙ্গণ

কুসুম বলে—হিংয়ের কচুরি, হিংয়ের গন্ধ । ওকে বলে হিংয়ের
কচুরি—এইবার বাড়ি যাও—

কুসুমের বাবু বলে—কে ?

—কলের সামনের বাড়ির ভাড়াটেদের ছেলে । বামুন ।

কুসুমের বাবু আমার দিকে ফিরে বলে—যাও খোকা, এইবার বাড়ি
যাও ।

একবার ভাবলাম বলি, আমি থাকি না কেন, থাকলে দোষ কি ?
কিন্তু কুসুমের বাবুর দিকে চেয়ে সে কথা বলতে আমার সাহসে কুলুলো
না । লোকটা যেন রাগী মতো, হয়তো এক ঘা মেরেও বসতে পারে ।
কিন্তু সেই থেকে হিংয়ের কচুরির লোভে আমি রোজ বাঁধা নিয়মে
কুসুমের বাবু আসা পর্য্যন্ত অপেক্ষা করি । আর রোজই কি সকলের
আগে কুসুম আমার হাতে দুখানা কচুরি তুলে দিয়ে বলবে—যাও খোকা,
এইবার খেতে খেতে বাড়ি চলে যাও—

কুসুমের বাবু বলতো—আহা, ভুলে গেলাম । ওর জন্তে খাস্তা গজা
দুখানা আনবো ভেবেছিলাম কাল । দাঁড়াও কাল ঠিক আনবো—

আমার ভয় কেটে গেল । বললাম—এনো ঠিক কাল ?

কুসুমের বাবু হি হি করে হেসে বলে—আনবো আনবো ।

কুসুম বলে—এখন বাড়ি যাও খোকা—

—আমি এখন যাবো না । থাকি না কেন ?

কুসুমের বাবু আমার এই কথার উত্তরে কি একটা কথা বলে আমি
তার মানে ভালো বুঝতে পারলাম না । কুসুম ওর দিকে চেয়ে রাগের
সুরে বলে—যাও, ওকি কথা ছেলেমানুষের সঙ্গে ?

বাড়ি গিয়ে মাকে বললাম—মা তুমি হিংয়ের কচুরি খাও নি ?

—কেন ?

জ্যোতিরীক্ষণ

—আমি খেয়েছি। এত বড় বড়, হিংয়ের গন্ধ কেমন।

—কোথায় পেলি ?

—কুসুমের বাবু এনেছিল, আমায় দিয়েছিল।

—পাজি ছেলে, ওখানে যেতে বারণ করেছি না ? ওখানে যাবে না।

—কেন ?

—কেন কথার উত্তর নেই। ওখানে যেতে নেই। ওরা ভাল লোক না।

—না মা, কুসুম বেশ লোক। আমাকে বড় ভালবাসে। হিংয়ের কচুরি বোজ্ঞ দেয়।

—আবার বলে হিংয়ের কচুরি ? বাড়িতে খেতে পাও না কিছু ? খবরদার ওখানে যাবে না বলে দিচ্ছি।

কুসুমের বাবু এর পরে আর দিন-দুই আদৌ গেলাম না। কিন্তু থাকতে পারিনি না গিয়ে। আবার মাকে লুকিয়ে গেলাম একদিন। কুসুম বলে—তুমি আসনি যে ?

—মা বারণ করে।

—তবে তুমি এসো না। মা আবার বকবে।

—আসিনি তো দুদিন।

—এলে যে আবার ?

—তোমায় ভালবাসি তাই এলাম।

—ওরে আমার সোনা। তুমি না এলে আমারও ভাল লাগে না।

তুমি না এলে তোমার জন্তে মন কেমন করে।

—আমারও।

—কি করবো, তেমন কপাল করিনি। তোমার মা তোমায় পাছে বকেন তাই ভাবচি।

জ্যোতিরঙ্গণ

—মাকে বলবো না। আমার মন কেমন কবে না এলে। আমি এখন যাই।

—সন্দের সময় এসো।

—ঠিক আসবো।

কুসুমের সঙ্গে চুক্তি অনুযায়ী সন্দের সময় যাই। কুসুমের বাবু এসে আমার দেখে বলল—এই যে ছোকরা। ক’দিন কেন দেখিনি? সেদিন তোমাব জন্তে খাস্তা গজা নিয়ে এলাম, তা তোমার অদৃষ্টে নেই। দাও গো ওকে ছুখানা কচুরি।

—গজা এনো কাল।

—আনবো গো বামুন ঠাকুব, ফলাবে বামুন! কাল অমৃতি জিলিপি আনবো। খেয়েচ অমৃতি?

—না।

—কাল আনবো, এসো অবিশ্বি।

—কাউকে বোলো না কিছ। মা শুনলে আসতে দেবে না।

—তোমার মা বকেন বুঝি এখানে এলে?

—হঁ।

কুসুম তাড়াতাড়ি বলল—আরে ওব কথা বাদ দাও। ছেলেরা মাগল, ওর কথাব মানে আছে! তুমি বাড়ি যাও আজ খোকা। এই নাও কচুরি। খেতে খেতে যাও—

—না, এখানে খেয়ে জল খেয়ে যাই, মা টের পাবে।

—এখানে তোমাকে জল দেবে না। রাস্তার কল থেকে জল খেয়ে যেও।

কুসুমের বাবু বলল—কেন ওকে জল দেবে না কেন? কি হবে দিলে?

কুসুম বাঁজের সুরে বলল—তুমি থামো। বামুনের ছেলেকে হাতে

জ্যোতিরঙ্গণ

করে জল দিতে পারবো নি। এই জন্মের এই শাস্তি। খাবার দিই হাতে করে তাই যথেষ্ট।

আমার মনে মনে বড় অভিমান হোল কুসুমের ওপর। কেন আমি এতই কি খারাপ যে আমার হাতে করে জল দেওয়া যায় না? চলে আসবার সময় কুসুম বার বার বল্লে—কাল সকালে কিন্তু ঠিক এসো। কেমন?

আমি কথা বল্লাম না।

পরদিন সকালে গিয়ে দেখি কুসুম বসে সজ্জনের ডাঁটা কুট্চে। আমার বল্লে—এসো খোকা—

—তোমার সঙ্গে আড়ি।

—ওমা সে কি কথা? কি করলাম আমি?

—তুমি বল্লে জল দেওয়া যায় না আমাকে। জল খেতে দিলে না কাল।

—এই! বসো বসো খোকা। সে তুমি বুঝবে না। তুমি বামুন, তোমাকে জল আমরা দিতে পারিনে। বুঝলে? কুলের আচার করচি, খাবে? এখনো হয়নি। সবে কুল গুড় দিয়ে মেখেচি—

এইভাবে কুসুমের সঙ্গে আবার ভাব হয়ে গেল। কুলের আচার হাতে পড়তেই আমি রাগ অভিমান সব ভুলে গেলাম। ছুজনে অনেকক্ষণ বসে গল্প করি। তারপর আমি উঠে মাখমের ঘরে যাই। মাখম কুসুমের পাশের ঘরে থাকে। ওর ঘরটি যে কত রকমের পুতুল দিয়ে সাজানো! একটা কাঠের তাকে মাটির আতা, আম, লিচু কতরকমের আশ্চর্য আশ্চর্য জিনিস। অবিকল আতা। অবিকল আম।

জ্যোতিরঙ্গণ

মাখম বল্লে—এসো খোকা। ও সব মাটির জিনিসে হাত দিও না।
বোসো এখানে এসে। ভেঙে যাবে।

—আচ্ছা, তুমি তামাক খাও কেন ?

মাখম হাসিমুখে বল্লে—শোনো কথা। তামাক খায় না লোক ?

—মেয়েমানুষে খায় বুলি ? কই আমার মা তো খায় না। বাবাখায়।

—শোনো কথা। যে খায় সে খায়।

—কুসুমের বাবু আমায় খাস্তা গজা দেবে।

—বটে ! বেশ বেশ।

—তোমার বাবু কোথায় ?

মাখম মুখে আঁচল চাপা দিয়ে হেসে গড়িয়ে পড়লো।

—হিহি—শোনো কথা ছেলের—কি যে বলে !—হি হি—ও কুসুমি,
শুনে যা কি বলে তোর ছেলে—

মাখমের বয়েস কুসুমের চেয়ে বেশি বলে আমার মনে হোত।
কুসুম সব চেয়ে দেখতে সুন্দর। মাখমকে দিদি বলে ডাকতো কুসুম।

কুসুম এসে হাত ধরে আমাকে ওব ঘবে নিয়ে গেল। কুসুম
আমায় বারণ করেছিল আর কারো ঘবে যেতে। আমি প্রকৃতপক্ষে
যেতাম খাবার লোভে। কিন্তু অত্র মেঘেদেব ঘরের বাবু কখন
আসতো কি জানি। স্মরণ্য সে বিষয়ে আমায় হতাশ হতে হয়ে
ছিল। কুসুম আমায় ঘরে নিয়ে গিয়ে বকলে। বল্লে—অত শত কথা
তোমার দরকার কি শুনি, তুমি ছেলেমানুষ ? কোনো ঘরে যেতে
পারবে না, বোসো এখানে।

—আমি প্রভার কাছে যাবো—

—কেন, সেখানে কেন ? যা তা বলবে সেখানে গিয়ে আবার।
বোকা ছেলে। খাওয়ার লোভ, না ? এই তো দিলাম কুলচুর।

জ্যোতিরঙ্গণ

আমি আশ্চর্য হওয়ার স্থরে বল্লাম—আমি চেয়ে খাইনি। প্রভাকে জিজ্ঞেস কোবো।

—বেশ, দরকার নেই প্রভার কাছে গিয়ে।

—একটিবার যাবো? যাবো আর আসবো।

সত্যি বলচি প্রভাব ঘরে যাওয়ার কারণ ততটা লোভ নয়, যতটা একটা টিয়া পাখী।

টিয়া পাখীটা বলে—রাম, রাম, কে এলে? দূর ব্যাটা, কাকীমা, কাকীমা। আমি ঢুকে দাঁড়ালেই বলে—কে এলে? কে এলে?

—আমাব নাম বাসুদেব।

—কে এলে? কে এলে?

আমি হেসে উঠলাম। ভারি মজা লাগে ওব বুলি শুনতে! অবি-কল মাহুষের গলার মত কথা—কে এলে? কে এলে?

প্রভা বাইরে থেকে বলে—কে ঘরের মধ্যে?

ও রান্নাঘরে রাঁধছিল। খুস্তি হাতে ছুটে এসেচে। খুস্তিতে ডাল লেগে রয়েছে। আমি হেসে বল্লাম—মাববে নাকি?

—ও! পাগলা ঠাকুর। তাই বলো। আমি বলি কে এলো জুপুরবেলা ঘরে।

—তোমার ঘরে কুলচুর নেই। কুসুম আমার কুলচুর দিয়েচে। খুব ভালো কুলচুর।

—কুসুমের বড়নোক বাবু আছে। আমার তো তা নেই? কোথা থেকে কুলচুর আমচুর করবো।

—কুসুমের বাবু আমার গজা দেবে।

—কেন দেবে না? মোড়ে অত বড় দোকানখানা কুসুমের পায়ে

জ্যোতিরঙ্গণ

সঁপে দিয়ে বোসেচে। ওখানকার কথা ছেড়ে ছাও। বলে—মানিনী,
তোমর মানের বালাই নিয়ে মরি—

ভয়ে ভয়ে বল্লাম—প্রভা, রাগ কোবো না আমার ওপর।

—না না রাগ করবো কেন। ছুঃখের কথা বলচি। আমিও এক-
পুরুষ বেস্তে। আমরা উড়ে আসিনি। পনেরো বছর বয়সে কপাল
পুড়লে ঘর থেকে বেরিয়েছিলাম।

—কেন ঘর থেকে বেরিয়েছিলে ?

—সে সব ছুঃখের কথা তোমার সঙ্গে বলে কি হবে। তুমি কি
বুঝবে। বোসো, আমাব ডাল পুড়ে পেল। গল্প করলে পেট ভরবে না।

—আমি যাই ?

—এসো বালাঘরে।

প্রভাব বং কালো, খুব মোটাসোটা, নাকেব ওপর কালো ভোমরাব
মত একটা জড়ুল। প্রভা একদিন আমাকে গরম জিলিপি আর
মুড়ি খেতে দিয়েছিল। ওর ঘবে এত জিনিষপত্রব নেই, ওই খাঁচায়
পোষা টিয়া পাখিটা ছাড়া।

প্রভা রান্না কঁবচে চালতের অঞ্চল। একটা পাথর বাটিতে চালতে
ভেজানো। চালতে অনেকদিন খাইনি, দেশ থেকে এসে পর্যন্ত নয়।
সেখানে আমাদের মাঠে তালপুকুরের ধারে বড় গাছে কত চালতে
পেকে আছে এ সময়।

বল্লাম—চালতে পেলে কোথায় প্রভা ?

—বাজারে, আবার কোথায় ?

—বেশ চালতে।

প্রভা আর কিছু বল্ল না। নিজের মনে রাঁধতে লাগলো।

আমি বল্লাম—তোমার বাবা মা কোথায় ?

জ্যোতিরঙ্গণ

—পাপমুখে সে সব কথা আর কি বলি।

—বাড়ি যাবে না ?

—কোন বাড়ি ?

—তোমাদের দেশের বাড়ি।

—যমের বাড়ি যাবো একেবারে।

—তোমাদের দেশের বাড়িতে কুল আছে ? আমাদের গাঁয়ে কত কুলের গাছ।

প্রভা একথার কোন উত্তর দিলে না। আবার নিজের মনে রাঁধতে লাগলো। খানিক পবে সে একটা ঘাট উল্লুনের মুখে বসিয়ে চা তৈরি করে গ্লাসে আঁচল জড়িয়ে চুমুক দিয়ে চা খেতে লাগলো। আমায় একবার বল্লেও না আমি চা খাবো কি না। অবিশ্বি আমি চা খাইনে, চায়ের সর খাই। মা আমায় চা খেতে দেয় না। চায়ের মধ্যে যে ছুধের সর ভাসে, মা তাই আমাকে তুলে দেয়।

প্রভা গল্প করতে লাগলো ওদের দেশের বাড়িতে কত গরু ছিল, কতখানি দুধ ওরা খেতো। ওদের বাড়ির ধারে ওদের নিজেদের পুকুরে কত মাছ ছিল। আর সে সব দেখতে পাবে না ও।

হঠাৎ প্রভা একটা আশ্চর্য কাণ্ড করে বসলো। বল্লে—অম্বল দিয়ে ছুটো ভাত খাবে।

আমি ভয়ে ভয়ে বল্লাম—খাবো। কুসুম টের না পায়।

প্রভা হেসে বল্লে—কুসুমের অত ভয় কিসের ? টের পায় তো কি হবে ? তুমি খাও বসে।

আমি সবে চালতের অম্বল দিয়ে ভাত মেখেচি, 'এমন সময় কুসুমের গলার শব্দ শোনা গেল - ও প্রভাদি, বামুনদের সেই খোকা তোর এখানে আছে ? ওকে বাড়ি পাঠিয়ে দিই, কঙক্ষণ এসেচে পরের ছেলে।

জ্যোতিরিন্দ্র

আমি এঁটো হাতে দৌড়ে উঠে রান্নাঘরের কোণে লুকিয়ে রইলাম।
প্রভা কিছু বলবার আগে কুসুম ঘরের মধ্যে ঢুকে আমাকে দেখতে
পেলে। বললে—ওকি ? কোণে দাঁড়িয়ে কেন ? লুকানো হোল বুঝি ?
এ ভাত মেখেচে কে অম্বল দিয়ে ? আঁঃ—

প্রভার দিকে চেয়ে আশ্চর্য্য হয়ে বললে—আচ্ছা প্রভাদি, ও না
হয় ছেলেমানুষ পাগল। তোমারও কি কাণ্ডজ্ঞান হারিয়ে গেল ? কি
ব'লে তুমি ওকে ভাত দিয়েচ খেতে ?

প্রভা অপ্ৰতিভ হয়ে বললে—কেবল চালতে চালতে করছিল—
তাই ভাবলাম অম্বল দিয়ে ছুটো ভাত—

—না ছিঃ। চলো আমার সঙ্গে খোকা। এ জন্মের এই শান্তি
আমাদের, আবার তা বাড়াবে বামুনের ছেলেকে ভাত দিয়ে ? চলো—
হাত এঁটো নাকি ? খেয়েচ বুঝি ?

আমি সলজ্জহুরে বললাম—না।

—চলো হাত ধুয়ে দিই—

কুসুম এসে আমার হাত ধরে বাইরের দিকে নিয়ে যাবার উদ্যোগ
করতে প্রভা বললে—আহা মুখের ভাত ক'টা খেতে দিলিনি ওকে।
সবে অম্বল দিয়ে ছুটো মেখেছিল—

—না, আর খেতে হবে না। চলো—

মায়ের শাসনের চেয়েও যেন কুসুমের শাসন বেশি হয়ে গেল।
মুখের ভাত ফেলেই চলে আসতে হোল। উঠোনের এক পাশে নিয়ে
গিয়ে আমার হাত ধুয়ে দিতে দিতে বললে—তোমার অত খাই খাই বাই
কেন খোকা ? ওদের ঘরে ভাত খেতে নেই সে কথা মনে নেই তোমার ?
ছিঃ ছিঃ—ওবেলা কচুরি দেবো এখন খেতে। আর কক্থনো অমন
খেও না। তাও বলি, এই না হয় ছেলেমানুষ—তুমি বুড়ো খাড়ি,

জ্যোতিরিন্দ্র

তুমি কি বলে বামুনের ছেলের পাতে—ছিঃ ছিঃ লোকেরও বলিহারি
যাই—

বলা বাহুল্য প্রভা এসব কথা শুনতে পায়নি, সে এদিকেও ছিল না।

বল্লাম—মাকে যেন বলে দিও না—

—হ্যাঁ আমি যাই তোমার মাকে বলতে! আমাব তো খেয়ে দেয়ে
কাজ নেই—

—বল্লে মা মারবে কিন্তু।

—মাব খাওয়াই ভালো তোমার। তোমার নোলা জন্ম হয়
তাহোলে—

বাড়ি ফিরতেই মা বল্লেন—কোথায় ছিলি ?

—ওই মোড়ে।

—আর কোথাও যাসনি তো ?

—না।

একদিন কিন্তু ধরা পড়ে গেলাম। সেদিন দোষটা ছিল, কুসুমেরই।
সে আমাকে বল্লে—চলো খোকা বেড়াতে যাই—যাবে ?

বিকেলবেলা। রোদ বেশি নেই। ট্রাম লাইনের ওপারে যেতে দেখে
আমি সভয়ে বল্লাম—মা বড় রাস্তা পার হতে দেয় না। বাঁরণ করেচে।

—চলো আমি সঙ্গে আছি ভয় নেই।

বড় রাস্তা পার হয়ে আর কিছু দূরে একটা খোলার বস্তির মধ্যে
আমরা ঢুকলাম। একটা সরু গলির, ছুধারে ঘরগুলো। যে বাড়িতে
আমরা ঢুকলাম, সেখানেও সবাই মেয়েমানুষ, পুরুষ কেউ নেই।
একজন মেয়ে বল্লে—আয় লো কুসুমি, কতকাল পরে—বাবাঃ,
আমাদেরও কি আর নাগর নেই ? তা বলে কি অমন করে ভুলে
থাকতে হয় ভাই ?

জ্যোতিরীক্ষণ

আমার দিকে চেয়ে বল্লে—এ খোকা আবার কে ? বেশ সুন্দর দেখতে তো ।

—বামুনদের ছেলে । আমাদের গলিতে থাকে । আমার বড্ড ছাওটো ।

—বাঃ—বোসো খোকা, বোসো ।

—ও ছেলের শুধু ভাই খাই খাই । খেতে ছাও খুব খুশি ।

—তাই তো কি খেতে দিই । ঘরে কুলেব আচার আছে, দেবো ?

আমি অমনি কিছুমাত্র না ভেবেই, বলে উঠলাম—কুলেব আচার বড্ড ভালবাসি ।

কুসুম মুখ ঝামটা দিয়ে বল্লে—তুমি কি না ভালবাসো । খাবাব জিনিস হোলেই হোল । না ভাই, ওব সদ্দি কাশি হয়েছে । ও ওসব খাবে না । থাক ।

আমাব মনে ভয়ানক ছুঃখ হোল । কুসুম খেতে দিলে না কুলচুব্ । কখন হোল আমাব সদ্দি কাশি ? কুলচুর আমি কত ভালবাসি ।

খানিকটা সে বাড়িতে বসবাব পরে আমবা অল্প একটা ঘরে গেলাম । তাবাও আমাকে দেখে নানা কথা জিগ্যেস কবতে লাগলো । বাড়ির তৈবি স্ত্রী খেতে দিলে একখানা রেকাবি করে । তাও — কুসুম আমায় খেতে দিলে না । আমাব নাকি পেটের অসুখ ।

সন্দের খানিকটা আগে আমাকে নিজে কুসুম বড় রাস্তার ট্রাম লাইন পাব হয়ে এগুপারে এল । একখানা ট্রাম আসছিল । আমি বল্লাম—কুসুম, দাঁড়াও—ট্রাম দেখবো ।

—সন্ধে হয়েছে । তোমাব মা বকবে ।

—বকুক ।

জ্যোতিরিন্দ্র

—ইস্! ছেলের যে ভারি বিদ্ধি!

—আচ্ছা কুসুম তুমি ওকথা বললে কেন? আমার কুলচুর খেতে দিলে না। ওরা তো দিচ্ছিল।

—তুমি ছেলেমানুষ কি বোঝো। কার মধ্যে কি খারাপ রোগ আছে ওসব পাড়ায়। তোমায় আমি যার তার হাতে খেতে দেবো? যার তার ঘবের জিনিস মুখে করলেই হোল, তোমার কি। কার মধ্যে কি রোগ আছে তুমি তা জানো?

—আচ্ছা কুসুম 'নাগর' মানে কি?

—কিছু না। কোথায় গেলে একথা?

—ওই যে ওবা তোমায় বলছিল।

—বলুক। ও সব কথায় তোমার দরকার কি? পাজি ছেলে কোথাকার।

কুসুম আমার বাড়ির পথে এগিয়ে দেবার আগে বললে—চলো, কচুরি এতক্ষণ এনেচে ও। তোমায় দিই—

—দাও। আমার খিদে পেয়েচে—

—কোন সময়ে তোমার পেটে খিদে থাকে না বলতে পারো? তোমার মাকে যদি সাম্না সাম্নি পাই তো জিগোস করি ছেলের অত নোলা কেন?

—নোলা আছে তো বেশ হয়েছে। কচুরি দেবে তো?

—চলো।

—গজা এনেচে?

—তা আমি জানিনে।

—গজা কাল দেবে?

—গলির রাস্তাটা কি নোংরা! বাবারে বাবাঃ!

জ্যোতিরীক্ষণ

—গঙ্গা দেবে তো ?

—হ্যাঁ গো হ্যাঁ ! এখন কচুরি নিয়ে তো রেহাই দাও আমায় ।

সে রাত্রে কুসুম আমায় আমাদের কলটার কাছে এগিয়ে দিয়ে চলে গেল । মার কাছে সত্যি কথা বললাম । কুসুমের বাড়ি গিয়ে ছিলাম । কুসুম কচুরি খেতে দিয়েচে । মা খুব বকলেন । কাল থেকে আমায় বেধে রাখবেন বলেন । বাবাকেও রাত্রে বলে দিলেন বটে তবে বাবা সে কথায় খুব যে বেশি কান দিলেন এমন মনে হোল না ।

পরদিন সকালের দিকে আমার জ্বর হোল । চার পাঁচদিন একেবারে শয্যাগত । একজন বুড়ো ডাক্তার এসে দেখে শুনে ওষুধ দিয়ে গেল ।

জানালায় ধারেই আমাদের তক্তপোষ পাতা । একদিন বিকেলে দেখি রাস্তার ওপর কুসুম দাঁড়িয়ে আমাদের ঘরের উণ্টো দিকের বাড়ির দিকে তাকিয়ে আছে । ওর সঙ্গে মাথম । মাথন এগিয়ে গিয়ে আরও ছুথানা বাড়ির পরে একথানা বাড়ির দরজায় দাঁড়িয়ে ।

আমি ডাকলাম—ও কুসুম—

কুসুম পেছন ফিরে আমায় দেখতে পেল । মাথমকে ডেকে বলে—
দিদি, এই বাড়ি—এই যে—

মা কলতলায় । কুসুম ও মাথম এসে জানালার ধারে দাঁড়ালো ।

কুসুম বলে—কি হয়েছে তোমার ? যাওনা কেন ?

মাথম বলে—কুসুমি ভেবে মরচে । বলে, বামুন খোকার কি হোল ।

আমি তাই বললাম, চল দেখে আসি ।

বললাম—আমার জ্বর আজ পাঁচ দিন ।

কুসুম বলে—তোমার মা কোথায় ?

—কুসুম তুমি চলে যাও । মা দেখলে পরে আমায় আর তোমাদের

জ্যোতিরীক্ষণ

ঘরে যেতে দেবে না। আমি সেয়ে উঠেই যাবো। চলে যাও তোমরা।

ওরা চলে গেল। কিন্তু পরদিন বিকেলে আবার কুসুম এসে রাত্তার ওপর দাঁড়ালো। নিচু স্বরে বললে—যাবো ?

মা ঘরে নেই। বস্তিনাথদের ঘরে ডাল মেপে নিতে গিয়েচে আমি জানি। এই গেল একটু আগে। আমায় বলে গেল—ছোট খোকার দুধটা দেখিস্ তো যেন বেঁড়ালে খায় না, আমি বস্তিনাথদের ঘর থেকে ডাল নিয়ে আসি—

হাত দেখিয়ে বল্লাম—এসো—

ও জানালায় বাইরে দাঁড়িয়ে বললে—কেমন আছ ?

—ভালো। কাল ভাত খাবো।

—ছুটো কমলানেবু এনেছিলাম। দেবো ?

—দাঁও তাড়াতাড়ি।

—খেও।

—হ্যাঁ।

—অসুখ সারলে যেও—

—যাবো।

—কাল ভাত খাবে ?

—দাঁবা বলেচে কাল ভাত খাবো।

—কাল আবার আসবো। কেমন তো ?

—এসো। আমি না বললে জানালায় কাছে এসো না।

—তাই করবো। আমি রাত্তার চুপ করে দাঁড়িয়ে থাকবো। শিস্ দিতে পারো ?

—উঁহ ! আমি হাত দেখালে এসো।

পরের দুদিন কুসুম ঠিক আসতো বিকেলবেলা। একদিন প্রভা

জ্যোতিরীর্ণ

দেখতে চেয়েছিল বলে ওকেও সঙ্গে কবে এনেছিল। ঐর্ভাও ছুটো কমলালেবু দিয়েছিল আমার, মিধ্যে কথা বলবো না। বালিশের তলায় লেবু লুকিয়ে রেখে দিতাম, মা ঘরে না থাকলে খেয়ে ছিব্ড়ে ফেলে দিতাম রাস্তার ওপর ছুঁড়ে।

সেরে উঠে দুদিন কুস্মের বাড়ি গিয়েছিলাম।

তারপরেই এক ব্যাপার ঘটলো। তাতে আমাদের কলকাতার বাসা উঠে গেল, আমরা আবার চলে এলাম আমাদের দেশের বাড়িতে। মা একদিন সোভাওয়াটার-এর বোতল খুলতে থিয়ে হাতে কাঁচ কুটিয়ে ফেলে। সে এক রক্তারক্তি কাণ্ড। হাতের কজি থেকে ফিন্কে দিয়ে রক্ত ছুটতে লাগলো। বাসার সব লোক ছুটে এল বিভিন্ন ঘর থেকে। কোণের ঘরের বিপিনবাবু এসে মার হাতে কি একটা ওষুধ দিয়ে বেঁধে দিলে। কিন্তু মায়ের হাত সারলো না। ক্রমে হাতের অবস্থা খুব খারাপ হয়ে উঠলো। মা আর রান্না করতে পারেন না, যন্ত্রণার কাঁদেন রাত্রে। ডাক্তার এসে দেখতে লাগলো। আমার মামার বাড়ির অবস্থা ভাল। চিঠি পেয়ে মেজমামা এসে আমাদের সকলকে নিয়ে চলে গেলেন মামার বাড়িতে।

আষাঢ় মাসের শেষ। ভাল ছুএকটা পাকতে সুরু হয়েছে। মামার বাড়ির গ্রামে মস্ত বড় একটা পুকুর আছে মাঠের ধারে, তার পাড়ে অনেক তালগাছ। আমি বেড়াতে গিয়ে প্রথম দিনই একটা পাকা তাল কুড়িয়ে পেলাম মনে আছে।

মার হাত সেরে গেল মামার বাড়ি এসে। ভাদ্রমাসের শেষে আমরা দেশের বাড়িতে চলে এলাম। কলকাতা আর বাওয়া হোল না। বাবাও সেখানকার বাসা উঠিয়ে দেশে চলে এলেন।

জ্যোতিরীকণ

সুদীর্ঘ ত্রিশ বছর পরের কথা ।

কলকাতায় মেসে থাকি, আফিসে কেরানীগিরি করি, দেশের বাড়িতে স্ত্রী-পুত্র থাকে । আমার পুরোনো কলেজ-আমলের বন্ধু শ্রীপতির সঙ্গে বসে ছুটির দিনটা কি গল্প করতে করতে শ্রীপতি বলে—
কাল ভাই সন্দের পর প্রেমচাঁদ বড়ালের স্ট্রীট দিয়ে আসতে আসতে—
ছধারে মুখে রং—হরিব্ল !

—আমিও দেখেছি । ঐ পথ দিয়েই তো আসি । আমি কিন্তু ওদের অল্প চোখে দেখি । ওদের আমি খুব চিনি । ওদের ঘরে এক সময়ে আমার যথেষ্ট যাতায়াত ছিল ।

আমার বন্ধু আশ্চর্য্য হয়ে বলে—তোমার !

—হ্যাঁ ভাই আমার । মাইরি বলচি ।

—বাঃ, বিশ্বাস হয় না ।

—আচ্ছা, চলো আমার সঙ্গে এক জায়গায় । প্রমাণ করে দেবো ।

বছর পনের আগে একবার নন্দরাম সেনের গলি খুঁজে বার করে মাখমের বাড়ি যাই । কুসুম, প্রভা কেউ ছিল না । ওই দলের মধ্যে মাখমই একমাত্র সে খোলার বাড়িতে ছিল তখনো ।

শ্রীপতিকে নিয়ে আমি চলে গেলাম নন্দরাম সেনের গলিতে । মাখম এখনো সেই বাড়িতেই আছে । একেবারে শনের মুড়ি চুল মাথায়, বকুশি বুড়ীর মত চেহারা । একটি দাঁত নেই মাড়িতে ।

আমি যেতে মাখম বলে—এসো এসো । ভালো আছ ?

—চিনতে পারো ?

—ওমা, তুমায় আর চিনতে পারবো না ? আমাদের চোখের সামনে মানুষ হোলে । ভালো কথা, কুসুমের খোঁজ পেইচি !

—কোথায় ? কোথায় ?

জ্যোতিরঙ্গণ

—শোভাবাজার ষ্ট্রীটে একটা মেস-বাড়ীতে স্নি-গিরি করে। ঢুকেই বাঁ হাতে। মন্দিরের পাশের ভাঙা দোতারা। আমার সেদিন নিয়ে গিয়েছিল মন্দিরে নীল পূজা দিতে। তাই আমার দেখালে।

ত্রীপতিকে নিয়ে সে মেস-বাড়ি খুঁজে বার করলাম। সন্ধে তখনো হয়নি, নিচে রান্নাঘরে ঠাকুরকে বললাম—তোমাদের ঝি কোথায় গেল ?

—বাজাবে গিয়েছে বাবু। এখুনি আসবে! কেন ?

—দরকার আছে। তার নাম কুসুম তো ?

—হ্যাঁ বাবু।

একটু পরে একজন লম্বা রোগা ঝি শ্রেণীর মেয়ে-মাছুষ সদর দরজা দিয়ে ঢুকে রান্নাঘরের সামনে এসে দাঁড়ালো। ঠাকুর বলে—ও কুসুম, এই বাবুবা তোমায় খুঁজছেন।

আমি ঝয়ের দিকে অবাক হয়ে চেয়ে রইলাম। বালাদিনের সেই সন্দরী কুসুম এই! মাথমের মত অত বড়ী না হোলেও কুসুমও বড়ী। বড়ী ছাড়া তাকে আর কিছু বলা যাবে না। ওর মুখ আমার মনে ছিল, সে মুখের সঙ্গে এ বন্ধার মুখের কিছুই মিল নেই। ঠাকুর না বলে দিলে একে সেই কুসুম বলে চেনবার কিছু উপায় ছিল না।

কুসুমও আমার দিকে অবাক হয়ে চেয়ে বলে—আমায় খুঁজছেন আপনারা ? কোথেকে আসছেন ?

—মাথমের কাছ থেকে।

—কোন মাথম ?

—নন্দরাম সেনের গলির মাথম বাড়িউলি।

—ও! তা আমার খুঁজছেন কেন ?

—চলো ওদিকে। কথা আছে।

—চলুন খাবার ঘরে।

জ্যোতিরঙ্গণ

খাবার ঘরে গিয়ে বজ্জাম, কুসুম আমার চিনতে পারো ?

—না বাবু।

—নন্দরাম সেনের গলিতে আমাদের বাসা ছিল। আমি তখন আট বছরের ছেলে। আমার বাবা মা ছিলেন ঈশ্বর নাপিতদের বাড়ির ভাড়াটে। মনে হয় ?

কুসুম হেসে বলে—মুনে হয় বাবু। তুমি সেই পাগলা ঠাকুর! কত বড় হয়ে গিয়েচ। বাবা মা আছেন ?

—কেউ নেই।

—ছেলেপুলে ক'টি ?

—চার পাঁচটি।

—বোসো বোসো বাবা।

আরও অনেক কথাবার্তার পরে কুসুম আমাদের বসিয়ে বাইরে কোথায় চলে গেল। খানিক পরে চট করে কোথা থেকে একটা শালপাতার ঠোঙায় খাবার এনে ছুখানা খালাতে আমাদের দুজনকে খেতে দিলে।

আমারও মনে ছিল না। খেতে গিয়ে মনে হোল। বড় বড় হিংয়ের কচুরি চারখানা। তখন মনে পড়ে গেল কুসুমের সেই বাবুর কথা, সেই হিংয়ের কচুরির কথা। মনে এল ত্রিশ বছর পরে আবার সেই লোভী ছেলেটির ছবি ও তার কচুরিপ্রীতি। কুসুমের নিশ্চয় মনে ছিল। কিংবা ছিল না—তা জানিনে। কচুরি খেতে খেতে আমার মন... স্মরণীয় ত্রিশ বৎসরের ধূসর ব্যবধানের ওপারে আমাকে নিয়ে গিয়ে ফেলেচে একেবারে নন্দরাম সেনের গলির সেই অধুনালুপ্ত গুড়ের আড়তটা ও রাস্তার কলটার সামনে, যেখানে কুসুম আজও পঁচিশ বছরের যুবতী, যেখানে তার বাবু আজও সন্ধ্যাবেলায় ঠোঙা হাতে হিংয়ের কচুরি নিয়ে আসে নিয়মমত।